

## Nowodhow an Seythen

19/08/08

Dehwelys yw Nowodhow an Seythen wosa diw seythen ha my dhe-ves.

Y'n termyn na yth esa nowodhow pella a-dro dhe logo nowyth Konsel UnnKernow.

An dhesinoryon re'n amendyas wosa lies krodhvol nag esa an desin Kernewek lowr.

I re withas an flammow, mes gul krows wynn warnodho may hyllir supposya y vos baner Pyran.

Hwath ny'n kar meur a dus dell hevel.

\*\*

Unn vledhen yw wosa tan yn ostel Penhallow yn Tewyn Pleustri.

Hwithroryon re guntellas bern a dhustuni hag I ow hwithra oll an kas.

Ymons I owth ervira an seythen ma mars eus lowr may hallo bos kas lahyl erbynn nebonan.

Tri gwest a verwis y'n tan euthek na... Joan Harper, peswar ugens bloodh hy oos... Monica Hughes, hwegh bloodh ha peswar ugens hy oos... ha hy mab, Peter Hughes, teyr bloodh ha dew ugens.

\*\*

Mowes yowynk a bymp bloodh a verwis an seythen yw passyes wosa koodh y'n dowr uskis.

Yth esa hi gans hy herens yn kerdh ogas dhe Stranedh... pan slynkyas an flogh byhan ha kodha y'n avon.

Yth esa hi perthys hanter milder kyns tus selwel a ylli hy thenna 'mes an dowr.

Gorrys dhe glavji veu y'n ayr-ambo... byttegyns hi a verwis dhe glavji Derriford.

An kreslu a lever bos pur uhel nivel an avon wosa meur a law.

Yma Konsel Kernow ow krodhvolas erbynn keskusulyans Sodhva an Post.

Yma pennrewloryon an Sodhva ow kovyn a'gan tybyansow war an dowl degea moy es teyr ugens lytherva yn Kernow.

An Konsel a grys nag yw an keskusulyans gwari hweg.

\*\*

Negysyow a-hys Kernow a lever bos an gewer hager ow shyndya negys an hav. Dell hevel, meur a havysi re erviras tylli rag dy'golyow tramor awos an glaw ha gwynsyow.

I re beu skwattys gans kudynnow a brisyow menoyl uhel ha'n crunch kresys keffrys.

\*\*

Ogas ha dalleth an seson rygbi nowyth yw... ha Nowodhow an Seythen a wra holya sewen bagasow Kernow.

Yma dhyn an seson ma, unn para yn Kenedhlek Onan wosa an Para Oll-Du dhe dhiyskynna arta dhe Genedhlek Dew.

Byttegyns... yma ken para Kernewek nowyth y'n nessa nivel ynwedh.

Bay an Menydh a wra junnya Resrudh ha Lannstefan.

\*\*

Henn yw oll rag an seythen ma... tereba nessa.